

四庫全書

集部

欽定四庫全書

集部

弇州續稿卷五十四

詳校官編修臣潘庭筠

中書臣劉源溥覆勘

總校官進士臣楊懋珩

校對官編修臣王坦修

謄錄監生臣張承恩

欽定四庫全書

弇州續稿卷五十四

明 王世貞 撰

文部

序

周是脩先生集序

當建文初人主厭馬上之業集諸郡國賢良文學登金華白虎之地於是解大紳起自謫楊文貞與泰和周是

脩先生起自薦而二薦者用王國官入史局與胡光大
金幼孜胡若思梁用昭善諸公皆江右人又皆同官相
切劑為古文辭是脩先生齒稍尊其詩與文貞皆工為
清雋溫厚之語不專以其才逞當燕師之下金陵諸公
皆相約死難然皆不果而獨先生從容具冠服雉經於
學宮之尊經閣文皇既紹大位追僂死難者甚慘至先
生名忽曰彼食其祿自盡其心耳何問為於是先生獨
以其遺體完又能完其族而於先生之遺詩文其禁亦

獨寬然離竄艱難之餘所存者無幾矣文貞際風雲登
宰輔後先生死四十一年乃始能志先生之墓而微露
其歎於是先生之集稍出有梓而行之者余故嘗卒業
焉萬厯之紀元下詔追表故死建文難者祀於郡國存
卹其後人金陵為先生死地得群祀而泰和其鄉又有
專祀先生之裔孫應鰲自以進士起家為丹陽令余過
丹陽治令出先生之集而授余請序之夫先生詩所謂
清雋溫厚者與文貞皆得虞揚之逸響固無論即一時

諸公或雄而博或暢而裁要皆難難治世之音不大詭
於格驟舉而讀之未敢有甲乙者至一聞先生名而神
氣忽若王目若開而明舌若津而潤諸賢之什非不工
固有黯然沮索然離者要不知其所自也夫子不云乎
詩可以興邇之事父遠之事君又曰興於詩夫豈直以
其辭將亦其人哉先生之文不能當文貞黻而亦自斐
然即詩可以例已余庸立人也烏能序先生集聊因令
之請而抒其願為執鞭者而已

鄒彥吉羣提齋稿序

彥吉之守黃州也次黃以前之詩而名之曰鷓鴣稿屬
余序之客歲溯長江禮玄嶽以其所著紀游編得賦與
詩如干首而名之曰玄嶽游稿又屬余序之今者偶余
於高座寺盡出其所著近詩為卷六為章不能二百而
諸體約略備矣名之曰羣提齋稿又屬余叙之至是凡
三屬客有誚余者曰語不已贅乎哉余謝曰不然嚮者
之序鷓鴣也序其進也以有待也其季子之聞幽而謂

始基之者乎其序玄嶽游也美其適也以有寓也其季
子之聞幽而曰蕩乎樂而不淫周公之東者乎今者之
序羣提也則成矣季子之聞頌而所謂五聲和八風平
節有度守有序將庶幾矣余可以無餘稱也已夫賦特
其一斑耳而有子建安仁之遺響焉五言古則靈運明
遠之雋也七言歌行則青蓮之放也近體則右丞嘉州
之婉麗也總之元嘉後而大厯前然其所自得要有出
乎其表而不受繩束者夫定格而後俟感以禦卑精思

而後出辭以禦易積學而後脩藻以禦陋觸機而後成
句以禦鑿四者不備非詩也彥吉為人孤潔自信慎許
可寡游道其自閩解學政歸而杜門尚徉於六秩之圃
故獲自致其詣於四者深造自得久而逢源烏能難彥
吉哉余非不知之顧少而忽焉老而見役於人以筆研
為徽纆其何足以當彥吉也集以齋齋以羸提楚語忍
辱也於世法為利雖然吾懼世之叢起而役彥吉也

王孟起詩序

建康為古帝王都會自司馬氏南渡以至元嘉大明之
世人主得漸息御園之役而從事執文士大夫因之以
有三謝顏沈江鮑及唐而得李供奉王龍標諸賢於是
鍾山大江之雄天闕栖霞之麗盡收而入於子墨之府
然其人多河朔之儉吳之儂蜀之寶雋而稱寓公游士
於土著百無一也豈所謂雄麗者不盡發於人也耶蓋
至明而高帝定鼎為天地樞九州八荒之精靈所輻輳
於是乎山川之雄麗漸化為人傑而薦紳先生則大司

寇顧華玉司僕王欽佩陳魯南太常許仲貽僉臬陳羽

伯今大名守姚

闕

輩山林之雋乃復有金元玉徐子

仁盛仲交輩大較不能與諸公當而今王孟起最後出
其地在仕隱之間其文亦以時法參奪之不能遽脫其
習以追角乎弘嘉之盛然少而為詩晚益篤好之今其
合者置之錢劉之側不至矍圃之見汰降而就景傳事
香山之叟吾故知其把臂入林也今操觚之士扼掣而
談建安開元驟見余之序孟起詩必大駭以多可少否

籍令苟徇少年之好而唯影響之趣余寧與此不與彼也孟起與余同姓其命名也蓋合得余名與字之一非偶然者故因詹吏部東圖之請而序之

阮生詩集序

余晚之金陵金陵故賢薦紳游客布衣之藪而至戊子屬大比士諸能操觚為古文辭者亦集而以余之猥先之也車門闢則襜褕蝨附揮汗而出褰中詩卷至不能徧讀而忽有少年子白晳豐下禮恭而宇溫已見其刺

則鄉進士阮子自華也已叩其家世則嘉靖間函峰中
丞子也已發其篋則為詩若干卷曰公幸一評騭我使
我受而考焉予時忽忽漫應之蓋旬日而阮子已去之
彭城累書數百千言申前請曰公不為我序我且穀於
彭城不復之公車矣亦會予事小間獲展卷則若從伏
日中雷電兩電交下快其爽而攝其橫又若游太鹵而
值十萬之衆車馳卒奔颺奪轟擊悠悠旆旌之意雖不
易尋亦足以雄矣然是十萬之衆其堪戰者幾不堪者

幾而所謂雷電雨雹其快者與攝者孰勝也子之語出於臆而發於機當於子之賞而不必盡程於古神有合而亦有離合則超乎人之表而離則左乎人之轍子且姑俟之今夫宛之駒左膊有孔而汗血者必千里時其秣縱其騁及壯而後銜勒焉使其步驟協而抑控工誰曰不千里不然吾懼其蹶也玉之猶為璞也卞和氏故寶之矣鑪盪砂石之工未至而遽獻之秦庭吾懼其猶故則也子且姑俟之阮子之友陸景成曰生非以子而

重也欲以子而規得所以重也且公之所序人詩夥矣
不必皆名士亦不必皆名語而子應之易何以難阮生
也余笑曰子以為易者愛而真乎難者愛而真乎若以
愛余規則可矣為我語阮子篋余序後十年而余不死
必能式新息之銅而刻子名於茗華之壁

談氏文獻錄序

談氏文獻錄者何錄談氏文獻也其稱文者何有天子
之丈冠之曰誥者十一曰敕命者七曰敕及敕諭者十

一次祠堂考禮之文也次愚慮草易之文也次遺稿次
摘稿次逍遙集次長嘯集次存稿詩書之文也次試卷
制科之文也次雜言方術之文也其稱獻者何有獻而
名於朝者有獻而名於鄉者有獻而以子名者有獻而
名於鄉先生社者皆談之雋也其文則皆談之華也疇
叙之談之後人思永也思永之言曰吾談之先自鄧子
始出遙裔而以禮樂訓魯或曰古譚談通譚子奔莒所
以有譚譚即談也夫吾何知譚吾知錫之有談而已錫

之談則自宋五經博士公從南渡始其入明而顯則自御史願學公始迄於今繩繩奕奕者若而世矣又若而人矣然而北不得婉崔李而南不得次王謝者則余之罪也余不能如薛宗起以片言而起其宗姑為之志其文獻者則庶乎以談有聞矣不佞謂思永子言似也而胡以志子試文也曰此余敝帚也幸程於有司而用它嫌棄之余廢不用矣夫左丘以盲廢而有國語馬遷以腐廢而有史記此其材皆足以紀國天下古今之文獻

而余僅能施之於一談雖然此余之所以志也故不忍
弃也不佞乃謂思永是編成而談之里薨若益而高其
墓之木若益而喬者非以此也耶即不然而更千萬年
有陵谷之變而談之文獻宛然在目者則皆子之功也
已

吳江吳氏家乘序

諸序族譜者曰譜者史也余則曰史者譜也史之興莫
備於司馬遷遷之紀皇帝三代以至春秋列國西京世

家靡不具其所由來而至於自叙則益詳矣其他同姓異姓之諸侯於績無可紀者亦必昭明其世次而為之年表班固氏因之以至范氏而後不能推見世家年表之意而略之而至於自叙未嘗不追本其所繇始追大王父而後班班矣乃至脩唐史而表宰相世系雖於事不甚雅而後之名家鉅公欲為譜者更於是取資焉余故曰史即譜也明興東第貂璫之胄不復能徵其先德而三事九列往往拔自寒賤吳越歙閩之間齒姓寔繁

而其久者至彼此不能相通金匱石室之藏又僅采左氏編年之例而識其大者於是史不能兼譜譜不能登史而修譜之家陋者安於挂漏侈者驚於張飾而譜之用復寢微矣乃今而得吳江吳氏譜吳以國為姓其在此而著者若大司馬公在南而著者若司空公不可悉知所知者宋有太尉某至端平間而千一公者始家吳江是為吳之十一世祖也千一公有子三人曰萬一萬二萬三公固多孝弟力田然未有顯者又四世而為

孝子公璋璋子宮保公洪洪子宮保公山凡八坐二人
藩岳郡二千石四人甲第六人鄉進士賢郎上舍若干
人百二十年來其纓弁紳衿之盛輝映吾三吳幾可以
稱世家而當嘉靖之初年譜成於草創而未備今其後
人承光乃能慨然舉而修之則吳之為吳赫然章矣其
紀叙則秩然理矣大槩首之以璽書則為誥者二十六
為敕命者二十二為敕及敕諭者十七為諭祭者五繼
之以譜傳則為千一公昭者暨其後者若而人為萬一

公穆暨其後者若而人又繼之以文獻則為誌銘碑傳
類若而篇諸所自構撰附焉又若而篇乃夫樂趙之思
二武韋陶之述祖德雖微言小咏亦有所不遺者承光
之著思亦厯矣余瑯琊之重在晉宋齊梁間至於趙宋
益有聞而明之重則自世大父工部公始寔與宮保公
同第成化乙未進士兩家喬木相望至於今吳中之甲
姓鼎族莫能三馮余故因承光之請叙而歸之若乃尊
始別源敦睦率誼之道則諸為譜者類能言之可無事

余余且治我譜矣

刻大藏緣起序

昔我薄伽梵之宰世闡化也以大慈力攝諸天龍鬼神人非人咸集而收之大法門佛子菩薩阿羅漢隨緣參發贊歎顯密圓通之妙蓋四十九年而所說何啻百千萬言所度之人因聲入悟者何啻百千萬衆薄伽梵遷化大迦葉阿難陀繼起而紹明之尚慮登壇之述不能逮遠而沒身之後微言泯而漸失其真相與結集成篇

以梵音寄梵書以梵書寄貝多羅葉上至國王宮下至
婆羅門家遠至娑竭龍藏靡不轉寫流布而大教之盛
如日中天矣後千餘年而震旦之文明日盛緣亦漸起
所謂菩薩阿羅漢者多下降於此方而竺法蘭摩騰遂
以四十二章經來其後鳩摩羅什佛陀耶舍輩為姚秦
主翻譯蓋以漢兒習梵語作梵字則甚難而法不廣以
漢語度漢字傳佛印則甚易而法亦流至唐而法師玄
奘西游天竺諸方遂悉奉諸經及慈氏所撰惟識諸論

來釐為三藏官置司翻譯易世之後得房融所譯楞嚴而教典備矣然法語既繁傳寫亦不易自通都大邑之外貧賤鮮事力之家有畢生不能見見而不能自致於是始知壽之梓而印行之流傳亦復廣矣顧諸經之流傳見者頂禮供養焚香唎誦而像引隆崇簡裘重大將攜遠致則有所不能循環咀諷則有所不便丹鉛注乙則有所不敢於是開士密藏始發心倣弘道比丘尼磧沙故事以儒書例募梓而尚書陸與繩太史馮開之相

與贊助成大因緣而二公仍各叙之太史所云彼梵夾者以敬奉為法事今梓以流行為法事其辭甚暫而盡余復何贅獨余嚮者疑觀世音大士以一人之身而具八萬四千燦迦羅首母陀羅臂清淨寶目以三千大千之界而無所不應隨應隨足以為萬萬無此事今以梓經一端而驗之固可推也夫百應者化身也不動者法身也梓者法身也流傳者化身也昔梓圓也今梓圓而滿也以目為耳是即觀世音如如不動即曰觀自在也

或謂觀世音之轉而為菩提達磨教外別傳不立文字而今乃以梓經擬之不亦左乎是不然當同泰永寧之際南北人主徇於有漏之果而泥於文言之粗其用益繁其浸益遠故達磨出而救之五六傳而後即心非心之教大行而弔竒者至焚像弃經書七佛名於袒服而流至於猖狂自恣併其跡而失之蓋棒喝之教窮而教典與宗皆兩屈矣若觀世音之再轉而為達磨也寧不思所以更救之乎余不敢遽謂密藏為觀世音轉要亦

能不失其意耳或又謂此末法時也薄伽梵嘗授記矣
念不久且歸之娑竭龍藏而何以梓為即梓豈復有如
迦葉阿難者能傳佛印也則又不然後慈氏而成佛者
非我瞿曇記耶一奮迅而立超三劫夫焉知末法之中
無龍女者出彼龍女寧受記者哉密藏其勉之諸為密
藏緣者亦俱勉之

題姜氏家乘後序

姜氏家乘者何姜氏譜也諸吳之為姜者文獻皆在焉

姜之先著姓四岳至太公望稱師尚父奄有海岱世世為東諸侯迨陳氏起而寢微然猶貴顯於隋唐間稱名族若吾吳邑之姜則自宋樞密副使遵始其後時有顯者十三世而為明汝州別駕信蚤舉鄉薦仕不甚達頗以政行稱諸孫濟不仕然亦有文兩世所交游多吳之學士大夫有志傳題像餞送說解及詩歌之屬百餘篇今其裔孫謚闕復纂而譜之餘以例附見焉蓋以朝籍按姜則姜無登者以文獻求姜而姜之為姜昭昭矣當

戰國之交姜之為公侯者幾三十世然微太史之世家
年表以紀之幾遂寥寥不復知有姜今以一副樞之後
為世次者且二十而瞭然若指掌其文辭亦俱燦然嗟
乎杞亦侯國也以大禹之後而夫子猶歎其禮之不足
徵然則今之姜豈直賢於昔之姜而已哉夫姜猶夫昔
杞也散而整微而不泯則譜力矣

潘景升東游詩小序

潘景升從余游每見必出其所業余因得以窺其進而

至歲之戊子秋謁余於金陵右司馬邸是時景升方與其儕偶相逐而角鴻都門之業尋久不利亟去余時卒未暇叩景升今年二月復游金陵則益梓其近詩若干首曰東游篇蓋景升家黃山白嶽間而又好游若金陵胥臺虎林山水固其比席間物至是遂渡錢塘栖四明四明襟海而孕山東湖其中古剎名蹟處處皆是景升與二三君子窮舟車杖履之勝發而歌詩往往清遠蘊藉如金閭鑿江諸曲能以宋齊樂府之調而出入建

安之門近體要亦不下大厯雖山水之勝有以啟景升而景升之深會獨詣其靈承者自不淺淺也間與其鄉衮方司徒及之方公欣然意合獨謂景升恂恂太學諸生步武尺寸不失而詩多燕姬越女譴浪挑寄之辭是不累異日縉紳間聲耶余報公將以景升真有之乎古之才人墨士志有所不遂則必借以發舒其抑鬱才有所不盡則復借以騁騫其藻麗此齊梁之所以輝映一時而青蓮少陵氏之所不能廢也令景升而改玉甚易

雖然何以稱哉司徒無以難也因志於簡端

華補菴先生詩集序

嘉靖間無錫有華從龍先生者弱冠而自邑諸生游太學可二紀而以尚書經魁順天薦又十年而成進士業五十餘矣為郎未六歲而自免蓋徧徻於湖山之社者又一紀餘而以考終先生故好為古文辭不以經術廢以故得晚達而古文辭有雋聲無錫與吾郡比壤郡故饒名士大夫若文徵仲父子祝希哲陳復甫許元復陸

叔平彭孔嘉周公瑕袁魯望之屬有屈年而與先交者
有屈先生年而與交者下上揚扝無時不過從先生父
曰海月翁擅計然之策起家埒素封而先生能以義散
之蓋終先生身五服之內外宗戚亡不濡潤者環所居
而稱里人亡不困廩我者吾郡之名士大夫皆以先生
故不虞陽家鷗鷖而先生之橐則已枵然垂矣先生之
詩得之文氏諸君子為多故不欲剗刻鉤索以崇其格
而極其變然大要和平有蘊藉語必實際藹然盛世之

遺響也余之先人大司馬公同先生舉於辛丑余弱冠時侍先生坐見目以小友未幾而竊從郎署後以使事歸飲先生綠雲窩眉宇襟度談笑非復人間人也自是俯締姻好余嘗竊謂吾家右軍五十餘辭郡不出先生之蚤退與之近而無競過之鄭公業有田四百頃而食常不足先生之好客不問產與之近而不為名高過之至於灑落消搖不佛而禪庶幾白香山詩亦稱是乃若真休之圃蓀川之別業吞彼履道里者三四所少僅蠻

素耳目之奉耳然亦足以觀先生矣先生所著詩文凡數十百卷多散佚而其存者曰句吳集曰近遊集曰北游集曰江州集曰改南集曰真休集其子司諭明伯鴻臚存叔輩能習先生之詩而不能梓至其孫太學之充始梓之而問序於不佞世貞嗚呼先生已矣世之慕先生而不及見者求之茲集求之而又不能悉先生則有不佞序在

巨勝園集序

鎮國中尉唐孔炎父者食邑於南陽與余竿尺還往者
一紀餘矣有子罷封未冠而出其文甚奇余時見孔炎
詩不甚多幾欲用吾家故事舍渾而就戎孔炎不以為
恠凡有所蓄古法書名畫之類皆屬余評題今年春三
月忽梓其所著巨勝園詩集寄余余讀之而甚愧嚮者
之鹵莽於孔炎也自余與歷下生脩北地之業慕好之
者靡不鴻舉豹蔚金石其聲以自附于古而才情未裕
景事寡劑驚於雄奇莽蒼之觀而畧於澹蕩優柔之致

識者歎馬孔炎長淮以北人也其調甚和而致甚清使
事必愜拈韻必穩高處可步武摩詰達夫下亦不失錢
劉亡論余家東吳不能盡廢其嗜即于鱗而在亦把臂
入林矣集中詩凡四及余然一見而三不見宜乎余昔
之鹵莽也朱邸中洪都用晦最蚤善余前年為其誌先
輔國墓次年序宗良詩今年復序孔炎詩且當復序孔
炎之子器封文矣視丁敬禮之於陳王陶隱君之於劉
俱差不為負哉或謂孔炎集獨偏於近體以為未備夫

古有以一五言為長城者有以一絕為宮辭者偏至之聖何必減於具體之微哉孔炎其肯余言否

張孟奇廣陵懷古詩序

天下所艷稱古蹟名勝關之西長安稍東洛陽江之南金陵姑蘓錢唐北則廣陵廣陵固東南大都會也當大業時淫主輕弃星拱之辰而寄棕此邦竭海內之事力以張飾之至唐而建節為巨鎮又以轉運度支之饒益之於是廣陵之富甲於諸藩鎮詞人騷客又多為歌咏

以益之而古蹟名勝燦然備矣一敝於五季之季再敝於南渡三敝於宋季四敝於元季遂蕩為烽火戈鋌之場朝暮異主遺黎孑然始以十萬家稱既而僅十七家耳以我列聖之生息南北之喉吭其盛獲稍稍差復然而一鹽客藪耳其於大雅未復也南海張孟竒今之才子也試於南宮不利奉其大人命游學於吳楚間而時時托栖廣陵嘗慨其古蹟之漸湮而名勝之不易屈指也博攷之文獻而得二十餘事事各有詩詩各有序序

則雅而裁詩則麗而婉有賦有興有頌有風讀之而蕪
城邗溝之巨麗詰士之義訓淫主之侈心若在胸臆間
矣孟竒過金陵書以示余余甚竒之已而走礪中贄以
謁汪司馬司馬欣然為雅語弁其首且以屬余曰幸而
續我此孟竒志也嗟乎孟竒豈以吾二人真能重天下
士若皇甫之於左生乎哉司馬才高固當予則何所識
知即玄晏之釋譏未能賢於太冲之三都也且真以為
吾二人重孟竒乎孟竒重廣陵乎

傅氏世系序

傅姓故無它望其先為殷聖相說寥寥者千餘年至漢而為陽陵景侯寬義陽侯介子昆陽侯俊壯節侯燮以武功顯高武貞侯喜以節概顯至晉而為清泉侯玄司隸校尉咸以雅諒顯司徒祗以政業顯至唐而為橫海節度使吳郡公良弼以勲猷顯至宋而中書侍郎獻簡公堯俞以清正顯忠肅公察以死難顯其它列服休采聲施於時者不可屈指數第晉以前不稱文而晉以後

不稱武豈時主之尚使之將無土風家習變使然也當
元世隱居不仕至明興而有太子太師潁國公友德者
出以神勇從高皇帝取天下長驅刈燕都掃秦隴蕩西
羌尋佩大將軍印定巴蜀下滇南高皇帝親為之銘詩
以褒揚之再啟茅土位上公子尚翁主東第徹侯功臣
亡敢與伉者晚節以功成見嫌而上春秋高不遑究身
後事於一切贈諡封錫之典皆闕焉傳自是頗傍落不
振至不能名潁公而潁公有一兄曰友仁以公故授冠

帶總旗蚤卒亡子潁公之長子曰駙馬都尉忠所謂尚
翁主者也次子曰孝出後友仁孝傳子漢又亡子於是
族之人保安州守潤以其次子寧為漢後得世其職凡
四傳而為昭信公某某傳今昭信校尉錦衣百戶時忠
信接禮人也任職亡害當遷而念其母老不安燕中養
請告扶侍還杭之忠清里以其暇頗修執文之業春秋
行視先壟慨然而歎曰傳之指不為少矣乃貿貿馬不
能名其先甚至命名不相避凶禮不相通使我華胄之

遙遙幾於伊川之被髮而祭者是非余責哉於是始論
次其先德而斷其始曰吳邵公之少孫思進公支子宗
也徙內黃內黃始也思進三傳而珏徙鄆之須城須城始
也又兩傳而獻簡公徙孟之濟源濟源始也又五傳而
至孫高徙杭之仁和仁和始也其弟亮徙鳳陽而潁公
繼之弟錦衣孝傳子漢而絕仁和之族寧繼之孝支子
宗也時既已論次其畧而介友人蔡大節以書請曰不
殺人下中何能光昭其先而整齊其世次以肅睦宗族

惟是不忍於傅之泯泯等於僇阜耳唯是吾子之一言而天下以為惇史幸憐而弁之俾以傅有聞焉夫余安能重傅且古所以叙譜之意則宋之諸賢已畧盡之復安用贅余獨悲夫潁公之功大而報微也隆慶初余以前觀察召用應詔陳言請錄高皇時功臣而首推潁公以為當封王爵繼絕賜祭格不報又二十年而召佐留樞復極言之主爵者嘆惜以為潁公功誠大然事久遠難明且其後凋落無可問者封王則疑重繼絕則見欺

請姑族之詔可主爵者議嗟乎以傅子所稱世系傅之為
傅班班也又何虞欺雖然士風之漓甚矣使余稍知潁
公之族繩繩若是余亦當捫舌嫌之避安敢婁陳之哉
若為傅之後人不必不名潁公當世宗之元年上已采
撫臣議祠公於滇血食世世勿絕矣

重刻古畫苑選小序

余鎮鄖時嘗欲薈叢書畫二家言各勒成一書苑已就
多至八十餘卷欲梓之而物力與時俱不繼其畫苑尚

未成乃稍哀其古雅鮮行世者各十餘種分刻之襄南
二郡郡地僻不能傳之上都又會聞襄本已蕩於江適
友人王光祿有志慕古余搜篋中僅得畫苑授之俾翻
梓以傳光祿請余題首余嘗謂書固小技然紀言紀事
要必托之以傳若畫最為無所係者譬則天地間之佳
木麗卉而已夫佳木麗卉了無益於天地然使大塊之
內盡刈而為甌脫鞠而為黃茅白草何所取觀哉故夫
畫之用饒才情者以為無聲之詩而愛紀述者以為無

文之史良有意也若夫推原證品合文與獻而紀之唐以前雖人殊要之皆不可及已是役也姚刺史某實司校讐焉法得附書

弇山堂別集小序

弇山堂別集者何王子所自纂也名之別集者何內之無當於經術政體即雕蟲之技亦弗與焉故曰別集也王子弱冠登朝即好訪問朝家典故典與閥閱琬琰之詳蓋三十年一日矣晚而從故相徐公所得盡窺金匱石

室之藏竊亦欲藉辟蘿之日一從事於龍門蘭臺遺響
庶幾昭代之盛不至志志甫欲命管而病妬之既而自
惟材力綿淺一不稱也所覩章奏竿尺賦頌之類鮮足
裒者二不稱也是非小有不當流禍後世三不稱也而
是時倡道者謂王子母受役於筆研以鑿性靈自是絕
意不復作其他有所聞見偶書之赫蹏以數篋貯藏尋
得間出之編次成秩凡九十餘卷攜來金陵署中梓人
翁生見而異之固請付剞劂是書行異日有裨於國史

者十不能二者儒掌故取以考證十不能三賓幙酒次以資談謔參之十或可得四其用如是而已而翁生者乃欲強以灾木何也惜乎吾見若之懵於什一息也

艾氏族譜序

艾無他族其先穎事齊為大夫食邑於艾因以邑氏派分而二曰秦曰蜀蜀之派別而六而其在滑石灘者復分而四宋世諸艾多仕為名卿大夫至明而益盛有給事中廣御史大中丞璞少司馬希淳侍御朴左伯可

久然皆散處一方而楚平江之派亦多仕宦為州邑職
至今大鴻臚公穆兄弟而大顯鴻臚之兄曰萬安令科
居官有聲實鴻臚公生而雋異博學工古文辭其在郎
署屬權相固恩寵不為其父服而大璫為之內主視事
如故公奮身與今太僕卿沈純父抗疏極論之拜杖闕
下肉盡見骨行戍萬里與鬼分日顧其氣益王節益固
最後權相死大璫逐天子旌召忠直敢言之士以不次
待之而鴻臚公獨逡巡未之應其難進易退之操為士

林模楷而前是鴻臚公嘗慨平江之艾齒日繁而未有譜也其先日益浪浪而其後日益林林也思有所以整齊之而會萬安公嘗以書自通於侍御朴盡得其先世之詳鴻臚公乃始纂集成譜凡六則曰譜例者其綱也曰世系者始自孔大夫以至秦蜀之派咸備焉獨詳於平江者志覈也曰大傳者宋一人明二十五人傳所知也曰家禮者示軌也曰族訓者敦睦也曰撰述者鴻臚之疏與紀難皆在焉而竿尺附之識大也嗚呼天下自

是真有艾矣當鴻臚公之抗節犯難初不復知有身寧復知族然今無論紳衿之與閭井覩姓而稱艾者必懣然曰得非鴻臚公耶是忠賢族也昔蜀人薛宗起以片語抗魏帝而得高其望帝謂之曰卿殆起宗耶非宗起也若鴻臚公者起艾宗者也當魏之時代北貴姓有去斤者特賜為艾然則艾亦有他望也耶公姑識之

弇州續稿卷五十四

欽定四庫全書

弇州續稿卷五十五

明 王世貞 撰

文部

集序

西陵董媛少玉詩序

周元孚氏以節概冠一世凡再上疏再得罪以謫而直猶未已其於星歷弧矢劍術無所不通精而尤好為古

文辭卽世之作者無以隕勝之始婦得安人汪美而賢
為元孚舉五男子皆育汪尋卒元孚痛不欲置偶久之
感異夢乃問繼於董而得少王者董女字也兄曰侍御
叔玉既歸元孚卽能撫其五子如汪已出謁舅姑卽又
能奉事舅姑如汪已而相元孚御減獲大小理家秉無
弗如汪者元孚心異之問能讀書否曰僅識字耳然見
元孚時時誦唐詩則亦誦唐詩所臆記可千首更問元
孚詩止此乎元孚曰三百篇其祖也遂益誦三百篇以

至漢魏六季諸名家亡弗誦者乃稍稍出其奇以與元
孚酬復元孚益大異之謂若詩成吾當叙而梓之以傳
後世少玉莞然曰吾婦也而又君之婦婦何必以詩傳
即傳而以君之婦天下孰不謂出君手何梓為元孚服
其言而止元孚才高而氣雄間不勝其用壯而少玉則
清潤婉秀往往發於情而止於義有不盡為閨幃所束
者當其得意時即元孚恍然不覺其左次而亡何少玉
以羸疾卒卒之年二十九耳元孚鳩其遺篇什多散佚

所存僅若干首乃梓之而請序於余余讀之曰元孚而不見夫三百篇乎二南而下多出於貞婦良媛之作刪者蓋錄其語而不必盡徵其人謂可以風可以志而已至於漢而始有能舉其人者獨司馬之文君秦之淑能與其夫子相偶敵文君之不以禮合無論然淑亦寥寥乎不能數章何敢望少玉哉少玉調雖止於唐然不落宋元矣使天假以年有自唐而上者咄咄逼元孚世且以元孚詩或出少玉手元孚甘之乎少玉他婦行尤工

具元孚序及馮開之太史所為傳中

喻吳皋先生集選序

當嘉靖隆慶間有博大剴亮鉅公若光州喻司馬吳皋者其數歷南北禦園安攘所在著聲實余嘗有傳傳之以為真一時社稷臣云公故好為古文辭冥探隱索務出於人所不恒道然才高而氣雄朝有所請夕靡不應故其所構撰為最繁操觚之士咸服其盛而駭其奇公厭世者久之而冢子督府叅軍少極悉其遺集見委以

刪定曰母貴多貴在可傳而已余卒卒鮮暇蓋僅閱歲而始能致雌黃之力凡得十之三以還叅軍而僭為之序序曰文之所從來遠矣自孔子為辭達之說而釋之者曰文者順理而成章之謂於是鉤棘晦僻者若在所汰斥而不載然孔子身刪詩書而喬僻峭厲之齊秦詰曲聱牙之盤庚皆存之而弗去至風之別而稱騷也則楚人之所以托風其君者務為纏綿迂晦之辭以自藏而少露其指則辭達之說有所不能盡用譬之於天

日月清寧者恒也雷電霰雨晦冥搏擊者其變也譬之
於山逶迤坦陀者恒也羊腸鳥道蘄削斗拔者其變也
要之其變也亦恒也詩之變至於任華馬異極矣文之
變至於樊宗師極矣此皆知變而不知變之為恒乃喻
公獨不然其險也必無躋其深也必無弗達要以說諸
心而暢諸理澤如也然則識公而未盡者駭其竒能盡
公者謂公之實毋愧於達也必以柔曼靡麗望公若不
足夫柔曼靡麗江左之音辭而中原之所不屑也嗟乎

使立而膚也毋寧立而骨哉少極第行之有劉子威袁履善者可就質焉

彭戶部說劍餘草序

彭潤玉先生者自諸生而貢禮部以選人分教宣城屬其子夢祖成進士為戶部郎弃官歸受其封故人或稱戶部君亦或稱博士君云先生而好為古文辭久而晚節益甚萬厯之戊子余起官白下先生特自全椒渡江屬故全椒令余君介以見余出其所近著詩一卷文一

卷曰說劍餘草命之序余復從余令所見先生前集十二卷曰無羶堂者得合讀之然後知先生所詣之深而且博也其詩皆婉曲工至能發其情以與才合而不傷格至於七言律尤有斲輪中鵠之巧若序記書傳之類古色與生氣相射於西京大歷吾不知何如即非近代所易辦也吾嘗屈指明興以至於今能為古文辭者亡慮數百千家其卓然名世者亦可數十百家要皆廟廊山林之傑乃欲舉博士廣文而稱之則不過臨川聶大

年吾郡黃應龍戴章甫陸象孫三四君子而已大年象
孫以詩勝應龍章甫以文勝然皆厖厖膚立而至用其
子有名位優游素封者鍾記室之品不能名一人此何
以故凡為博士廣文者勢必久困諸生諸生之業不過
剽竊儒先之緒而微餽飭組織之欲分功於古文辭則
其業疎以古文辭間之則其業雜加之以歲月磨而耗
之甫得一官有餘晷始欲呻吟以從事古之作者而不
知其精已銷亡矣故夫山林之傑必其不為諸生者與

為諸生而不終者也若乃有子而稱封君者其得志當亦以晚是不握牙籌操利孔漁獵其鄉閭以為子孫計則必恣鼎味擁姬姜呼盧飛白以極當年之樂而尚恐不足寧暇刺促筆研間哉先生之篤嗜在古文辭其始不以諸生之業奪其後又不以封君之饗奪宜其所著述富有而日新若此也語有之用志不分乃凝於神其然哉余近一見夢祖詩以更超先生乘而上之父子間自為知己若此先生之集更未可涯也名曰說劍餘草

夫莊周隱士耳其著說劍能使人攘袂而思奮陶潛之詩何其冲然澹宕也詠荆軻一篇慷慨感激於劍術之疎深致意焉然則先生之壯心寧獨栖栖於一文苑而已也

大中丞顧公撫遼奏草序

御史中丞通州顧

闕

卿之為戶部郎即以才選而僉

福建臬計平邵武黨斗亂民尋遷廣東之叅議以至臬副從征山寇有功而中忌者歸久之乃補僉滇中臬解

順寧大候二州土酋之構詔還公叅議於浙江兩年復還公臬副而飭霸州兵事會浙有驕卒之變屬撫臣銅梁張司馬密捕誅之司馬恐不任於是奏留公浙江以自翼凡十日而驕卒之首惡悉授首詔加公三品俸以原官飭薊州兵事霸薊俱天子之東南北門而公皆以才選公至時方有稻田使者公與之合筴興水利募農耕奉行之臣凡十餘道而獨公所治已見利數倍會遼左之撫臣缺詔推賢能知遘務者公遂超為右僉都御

史以往公上疏力辭謂往歲於藩臬前後薄有成效皆因人成事身所建畫又多不待竟而遷浙中之役甚愧同事者或以小嫌見累而已獨得超拜甚不安誠願以故秩為縣官捍薊邊且得究稻田之利優詔不許而以稻田事責代公者公既至屬北兵大入與征北前將軍太保寧遠伯李公合筴討之公任謀李公任勇大破創其衆斬首以千計鹵駝馬牛羊萬餘公叙所以勝狀宛曲如畫而力推功於寧遠請毋賞及臣賞及臣不足以

勸戰士天子為之首錄寧遠而公與總督王公俱遷公
自僉而副賞亦差次之當公之在遼遼困大水千里為
甌脫公請開海禁議蠲卹得報可公益與總督王公大
師李公條遼事之所以難大勢有四謂邊長寇衆兵寡
餉薄畫圖貼說而上之其所思以濟拯之策甚詳天子
得公疏下大司馬大司農議之亡不朝上夕許公自是
益發紓諸所建白與注措略相當自公之在遼士飽馬
騰遼遂以重冠九邊議者知以戰功推寧遠不知所以

作寧遠之氣而礪其爪牙者固公力也吾觀近世之善
言邊事者於西北推楊文襄公應寧於東北推翁襄敏
公仁夫於南推王文成公伯安文襄詳而不甚文襄敏
文而不甚暢文成兼暢與文矣而不甚覈乃具體集成
則惟公哉公與予交頗晚而最為相知癸未之冬余與
今相國太原公俱杜門却掃有志游方之外公謂余毋
事筆研謂太原公毋應世今太原公已拜相樹平章之
績而余亦謬誤一出不唯不能從公教而卻筆研之累

且為公犯綺語之戒矣公自薊以前所興立不能自達之於上而徃徃托之移牘丁亥而後其因驛上封事者又不知其幾余所叙僅公一斑耳公於出世經世二端似能合之余且與太原公托自解馬當不以我為綺語也

休寧茗洲吳氏家記序

自太史公之為史記而別叙傳於其後欲以明其所以作史之意而推本其世系而尤詳於顯賢者班氏之史

亦因之自是若瞞若約之類雖或文有詳約辭有工拙
要之惟二史之步趣太史公之傳其父談也班氏之傳
其父彪也二史之所從草也若周之衰春秋戰國而名
世家漢之初兩姓諸侯王而名表者則本始派系皆彬
彬可考譜由是昉矣休寧之吳故姬姓其先自太伯凡
數十傳而國滅因以國為姓長沙忠武王而後代有顯
賢不絕其在徽郡至數萬餘指而休寧獨擅其半休寧
之南曰鳳山以唐左臺公始也其西曰龍江則吳媪始

也鳳山之指繁不能自衣食有吳媪者嫠而材攜其孤處馬簞路籃縷以啟山林西徙之吳乃有家矣凡四傳擇饒地轉為茗山茗山之吳吳始有族矣當明之興茗山之吳已草創成譜而東山趙子常占之以為吳之後必大蓋百有七十年而尚泯泯如也最後乃有吳廣文子玉父子廣文之父曰隱君某博學工古文辭慨然有意於先世之業取舊譜而新之整齊其世次俛就緒而卒年僅三十九當是時廣文猶在髫輒抱遺書而哭曰

孤不執脈管而以終先人之遺志者有如日未冠讀經史執文諸篇凡數百千萬言其所撰述凡十年而傾邑又十年而傾郡又十年而傾海內學士大夫咸曰吳子今之太史公班氏也廣文跋然不佞惡敢當之乃出隱君之遺書而加鉛槧焉曰姑有以矩矱我庶幾吳德之不墮蓋既成而名之為家記所以不稱譜者何以非譜所既也亦吳史也曰記者何謙辭也為記之目凡二十卷凡十二用太史公班氏法也其序例辭則左丘語也

諸序吳氏家記者咸曰吳子今之太史公班氏也吳子辭而歸德於隱君則曰隱君吳子之談與彪也弇州生亦云吳子聞之請而弁諸序者

少師大冢宰贈特進太傅蒲坂楊襄毅公錄序

萬曆元年十月少師吏部尚書楊公以末疾乞骸骨歸里上不允若曰是唯皇祖考之所爰立以佐余一人將統均是毗溫詔凡再下公請益力始予馳傳歸賜寶鉉綵幣以行且曰卿其彊精神善醫藥庶幾旦夕有瘳以

終毗朕明年八月公疾益甚薨於蒲坂之里第事聞上
為之震悼輟朝下所司援故事賜祭者九卜兆域以葬
特贈太傅謚襄毅公既葬久之長子今少司馬俊民以大
理少卿遇覃恩得追贈公特進於是司馬乃合公所得
敕命二通誥命十八通敕諭闕十通諭祭文九通錄
成帙而故太師徐文貞公撰神道碑太保呂文懿公調
陽撰表前太師張公居正撰誌銘太師張文毅公四維
撰行狀與諸所司覆請之疏悉附焉於是乎榮哀之誼

備矣吾吳中飭兵使者李君涑梓之郡而以司馬之指
來問序不佞守尚書郎時嘗得望公於班行中風采如
峙玉既跡其行事則昌黎氏所謂龍虎變化不測傑魁
人也又既而以通家子命不佞則春風霽日靡所不煦
朗蓋是時南北爭侵擾蠶食我喉咽要腹之地邊圉之
職儲胥者智力俱困而不能支天子方自管三尺日以
雷霆殷殷其上而柄臣乃陰操其喜怒以為威福當是
時中外之望獨寄於公一人公不愛其身與其材力以

應之四出而將數萬之疲卒於西於東北於東士奮而騰卑城淺隍忽若易而金湯者敵皆逡巡遁逃而不敢犯間一接之斬首鹵生不以數百千計不止三入而領中樞北籌邊東南制倭西南策苗獠明光之疏朝上而夕報可無一不當上意片紙下於萬里之外奉若神明而不敢貳雖柄臣睥睨其傍以伺公之隙而卒不可得自是歷佐三朝或長銓地或仍領中樞或再長銓地皆與大相相表裏大相明則直以伸其志大相忤則宛以

完其節所謂大相者其勢之軋時負而時勝而公故皎然自若其官則自太子少保徧歷東宮三師以至人主之三少其祿則正一品而勲則柱國階則特進子孫多賢貴若少司馬及進士俊士都督府都事俊彥都督府同知俊卿胄子俊臣諸孫翰林檢討元祥而下凡十餘人繩繩趾美弗絕論者多美公一時之際以為君與臣合嗟乎君臣之際蓋難言矣世宗皇帝得聖之威而大相中間之為之臣者十一得如公否也不然且以為人

與天合然所謂人者凝之獨在公公故純心與才合也
遠固未暇論公之鄉人在唐有裴晉公者其祿位名德
出入將相大較與公類第公之處敵難而裴公之處敵
易然裴公之告成者竟一蔡州耳而竟不能得志於鎮
魏公之婁出而婁不挫抑何逕庭也裴公據上相數為
居其下者所扼如皇甫鎛李逢吉李宗閔輩時側目焉
揆席搖而弗獲暖乃據公上者豈盡賢顧安公而公疑
裴公之後無顯者彼郭汾陽李西平之後顯矣而推不

文故不能悉紀三公之盛而著之琬琰自史傳外寥寥
焉以公今日之紀視三公其天之合何如也君子以公
真能臣公之子若司馬諸君真能後故不辭而授簡焉
以復于司馬

大司馬趙公燕石集序

嘉靖中余守尚書郎獲接天台趙公於御史臺時公以
盛年据顯位然多折節待後進未嘗一露得色而同舍
郎有應君明德者時時為余言趙公之為長者自天性

非有所矯強也余出副青齊臬坐家難歸而公歷左右
司寇以至正位留都大司寇其清白之操持衡之守為
天下平而是時公之父母年八十餘尚健七箸既以公
考最封如公秩矣公乃懇乞骸骨歸養凡再上疏乃得
請而屬先帝更新朝政於大僚庶尹有所登黜中外臺
省諫臣爭稱公賢不宜老之林壑詔特起守故官尋轉
南京大司馬叅贊機務所以寄藉良至公既依依二尊
人膝下不忍離復再上疏乞休溫詔許之然公至明年

忽遘疾不起而二尊人故無恙也縉紳先生母不以國寶家楨一時摧折為主上與公之父母惜而又重公之始為忠而卒以孝終蓋兩完矣公卒之年而貞復起叅浙行省又二十年而始遷今官趾公後道經毘陵晤公之介子某別駕君出公所撰名燕石集者凡四卷授而俾卒業焉乃歎曰公真長者公真長者余雖少於公十五歲然當公之見接時以操觚之末技猖狂都下都下諸公工其業者靡不悉出所長以相揚扆而公粥粥若

無所知能詢之人不知趙公工是業也應君故好古文
辭然所以稱公獨長者耳亦不言公工是業也今讀公
詩則皆和平朗爽有朱絃疏越之音而五言古近體尤
自長城至於文典雅簡勁太羹不和之味流羨於齒舌
間彼橫溢而自謂才鉤棘而自謂調者故退然而下風
矣公不以名其業使操觚之人無能名之及藁存而目
之燕石公豈其石也要之竟不欲以其長鳴終始不離
長者乃爾公諱大佑字世徹登乙未進士別駕名成孚

故嘗司諭嘉定與余善溫敏而文有父風

風士錄序

風士錄者何侍御李公按吾吳四郡輶軒所經以公車之業試士而錄其尤以風者也稱風者何緣詩起也若列國之有風云吾吳風之在詩者故輕靡以華勝今而華實裏矣在公車業者故純雅有方幅今或用才而過以險語盤調相角矣日者大宗伯有憂之為上言諸省與南宮大造士必取通明經術不詭於道者不然即才

而奇弗錄於是齷齪選悞之士亦時時雜進而輕俊少年之用屈諸輕俊少年咸相驚謂大宗伯之微指欲右中州而左吾吳若越不知其所推引而為後進模楷者故太傅王文恪公尚書瞿文懿公二公吳人也御史中丞唐公唐公晉陵人晉陵亦吳也大宗伯之所左在今吳而所右實在昔吳也侍御公復憂之豈其未易而今將強變而昔或兩墮耶是故輶軒之所經首以試士為要及竟試士之業而後喜可知也曰甚矣風之易也天

子之可大宗伯請僅歲餘而翕然一變至此哉即無論三公之謂何彬彬乎質有其文矣吳守石君請梓之曰故事也李公曰梓之第省可三之一梓而多以為諸生好則可以風之則未也蓋僅百餘篇云世之小公車業者謂經生之文多割飾而於聖人垂世之訓無所發論策士之文多剽括而於聖人經世之用無所補夫士藉以應弓旌鵠耳安用是紛紛為是不然在上者患無以風之耳風之而能去其割飾則聖訓也能去其剽括則

聖用也語有之今之樂猶古之樂也夫不佞未究於此者聊以塞公與石君之請公按吳值大水旱上書為元元請命得報蠲賑以數十萬計諸所募畫哺衽之筵萬方石君能奉而行之於吾夫子富而教之之旨蓋兩至者公濟寧人甲戌進士石君黃梅人庚辰進士

文起堂新集序

張幼于有堂曰文起而名其集則詩若文咸萃焉其續集則有文而無詩今者復攜一編曰新集過余則有詩

而無文謂余姑為我更序之余始識幼于甫二十白晢
美姿容與文徵仲王祿之諸先生游當是時其才橫肆
不可當讀之若入武庫雖五兵爛然不無利鈍至卅餘
乃始稍稍就繩墨而以清圓流麗為宗畦徑雖絕而精
思微遜所謂文起堂集者也余讀新集則情事劑矣意
象合矣出之若自然而探之若益深博而去其雜竒而
削其險劇而洗其跡于是乎幼于之詩成矣幼于有所
構撰余輒為之序之丁亥卜藏于

闕

山之

闕

而屬余

草生誌今者去耳順尚四載其大用固未可量而所構
撰亦詎止是哉雖然余老矣所以為幼于不朽者伎亦
殫矣夫玄晏故不能勝左思陳王卒何藉乎敬禮夫夫
亦可以已矣

集虛齋書義序

異時大宗伯河南沈公言諸生少年之為公車業者日
習為恠誕以相高而不得聖賢立言之旨宜一切通行
裁正以成弘間為鵠故王文恪公瞿文懿公為昇當是

時天下之士有應有不應而吾吳為二公之鄉以故其應為稍速嘉定則吳之下邑也前沈公而為大宗伯者其邑之徐公徐公博曉經術攻古文辭而間出其餘以治制科業又少時嘗與瞿公相下上以故嘉定之應之為尤速今進士李先芳鄉進士金兆登胄子徐兆曦張其廉諸生婁孟堅等十一人皆其邑之良而游於徐公之門及為其子壻者也相與琢劘其業曰使吾閭然而遽欲紹明成弘之統則有所不敢拊膺濶視而自附

於二公曰吾其文恪乎子其文懿乎則有所不能務於
弔詭而自逃於新令之外則有所不可剽腐趣易以求
合於用事者之目則有所不屑吾求得聖賢之所以立
言者而已矣求聖賢之所以立言者求之心而已矣吾
兒士駿奉其辭百四十篇以示余讀之見而劇而不刻
肆而不驚馴而不凡步驟有節咀諷有味庶幾乎求之
心者哉嘉定故多材然於科目往往不能當諸邑自今
而往將習習霞舉矣其為我謝徐公得非公之力也歟

王夢澤集序

楚有王夢澤先生廷陳者當正德中成進士高第讀中
秘書以伉直故卒廢死余為郎時先生尚在念不獲侍
門牆獨得其詩若文習之以為快歸吳有執苑卮言紀
其雋語俠氣頗稱于人人而未能定其品晚節宦游金
陵而先生之孫潁州太守追伊重梓其集於郡而俾余
序之余故嘗通楚檣杙諸家言竊謂春秋之季其主筆
路籃縷以啟山林其民魑結左衽日尋于干戈豈復暇

問觚管之業而時已有倚相伍舉者出而綜墳典嫻辭
命厥後屈左徒氏遂以騷辭開百世宗而宋玉唐勒景
差之徒相與紹明之及秦漢而後小有顯者亦不能與
東西兩京之彥埒至唐而僅有襄陽杜氏孟氏杜氏之
業差為宏博與屈氏分途而偕不朽若文史論建可稱
述者抑又鮮矣明興百五十年而始有先生先生甫弱
冠天才橫溢飛聲執林超宋乘而上之步武開元大厯
以與六代接文則自西京而下之亦不失六代其尤雅

雋者書牘大小數十言言子長少卿也詩無所不工麗
而五言更長城矣先生既以直廢死不得珥簪荷管為
縣官司述作之柄繼先生者三太史俱以博大奇偉稱
雄館閣間然有韻之辭視先生不啻徑廷也後先生三
十年而先生之鄉人則吳明卿氏先生有專詣而明卿
取兼能若今周元孚鄒孚如諸君子交轡而馳康莊焉
能舍先生赤幟哉嗟乎衡泰寥二嶽七澤三湘山若增
而隆從水若闢而灝漾者其為先生輩耶非耶余文蕪


不能當先生雖然潁州以為前茅而余且私其驥尾矣
梅季豹居諸集序

弇山人曰余少年時稱詩蓋以盛唐為鵠云已而不能
無疑於五言古及李于鱗氏之論曰唐無古詩而有其
古詩則灑然悟矣進而求之三謝之整麗淵明之閒雅
以為無加焉及讀何仲默氏之書曰詩盛於陶謝而亦
亡於陶謝則竊恠其語之過蓋又進之而上為三曹又
進之而上為蘇李枚蔡然後知何氏之語不為過也四

言則國風而後絕矣騷則左徒神而賦則文園聖蓋並軌於康莊而分鑣於廣莫本不異也厥後以鋪張馳騁相競所謂記繁而志寡者班張而下咸有之以故賦之用日廣而騷遂屈斯義也徐昌穀之談祗胡元瑞之詩藪能稱之而獻吉與仲默間能為之今天下之操觚者不少矣往往樂近體之易入耳而輕得名洋洋乎靡所不條貫至於歌行之類則艱習之何論五言古若騷賦風雅與之談未有不思卧者矣戊子冬為有舉宣城梅

季豹者曰是夫也能不為近體人也已而季豹來謁今年冬則出一編所謂居諸集者見示則皆騷賦四五言古詩余乃以暇卒業焉大歎詫曰世故有人哉若季豹之為騷賦於左徒文園時時取財而別具悲慨婉治之態五言於漢魏時離時合而其合者并其氣度色澤得之惟四言不能窺風雅藩要之梁陳而後絕影矣使季豹襲古衣冠而不為金陵市客而訪我於弇中吾且以為千載人焉敢以季豹目之故慨然為序其集集曰居

諸者蓋猶有待也季豹志也若其篇攻字琢為季豹忠
臣者則有其宗人台祚在



舟州續稿卷五十五

欽定四庫全書

集部

弇州續稿卷五十六

詳校官編修_臣潘庭筠

中書_臣劉源溥覆勘

總校官進士_臣楊懋珩

校對官編修_臣王坦修

謄錄監生_臣張承恩

欽定四庫全書

弇州續稿卷五十六

明 王世貞 撰

文部

記

太倉州重修儒學記

太倉之學故寄衛自弘治丙辰始建州而衛學歸於州者八十三年於今矣釋菜之宮獨巋然一魯靈光而諸

講堂誦舍以至博士退食之所多摧圯剝落風雨割其隅霜露降其席博士師弟子鞠於草莽而不能時授受謀所新之者欲請於御史諸臺而不果會州守張君朔望朝夫子宫喟然而嘆曰是烏足以煩諸御史臺即不穀忝為其州大夫而忍於其子弟之學者乃首捐其贖鍰之橐以畀諸能吏陶瓦斬木甃聖棟采之資不浹日而辦不移月而煥然一新於是博士師弟子胡先生輩相率而詣余請一言以侈大張君德意而申相儆俾示

永永余不敏竊謂古之所以造士於學者莫盛於三代庠序校之為名人倫之為實典謨雅頌卦爻之為誦縞收端皞皞紳綦偁琮璜琚瑀之為佩服而逶迤周旋咏歌擊拊之為容聲諸學士大夫類能舉之而學之弊亦莫盛於後世師之所以誨與弟子之所以學者束縛於經生之制甚而至於訓故之凡亦不能守而巧為俳調以苟徇之伸吟佔畢以希異時之青紫目若望羊心搖搖若懸旌一得志而隨弁髦之矣毋論其精神之所注

寓即不知禮樂射御書數為何物將何取於學也學士大夫類亦能訾之而余顧竊有疑焉夫遠不能舉二代即周之盛時曰成康而其所造以貽昭穆之季者不聞修周召之業以協和萬邦撫來四夷而周召暨呂畢諸聖人或貴自王室或賤自漁釣亦非有得之於青衿譽髦之選者何也猶未也以吾夫子之聖而七十子皆負異資而為之依宜其處者皆聖嗣出者皆王佐而性與天道自顏曾之外寥寥不數聞大則國相小則家臣業

已見其能於公私之朝而所就不過足兵裕民之微緒而已西河濟南之徒厯厯守一經之疑似而不能息處士之橫議賴孟氏而始振之至學校之設不肖者若原氏之鄉士欲毀之以紆議而賢者則東京之雋以名相使激而貽憂於社稷數千年之後忽起而濂洛關閩再起而左廣東越或以超曠之識挾千聖之真傳或以精微之力析千古之疑翳此其人徃徃家庭父師之所講求而其大要乃自得之心而已夫豈一學宮之力雖然

即境以探真由器以悟道雖灑掃應對可通禮樂而窮
神化況於本經術而訓故之世之人苟有能緣此而自
得者即成周之所以造亦末也蓋學成而張君署其堂
之後楹曰振德而余推其指於自得如此君名博字子
約山陰人舉乙丑進士自戶科左給事中謫累遷吾州
守其於民能富而教之胡先生名大雅諸博士某某於
法得附書

休寧縣重修文廟儒學記

自三代以降天下有學而無祀所謂庠序校以至泮宮
辟雍之類諸博士弟子以歲時講修詩書禮樂射御之
文極而至於邦國大夫於此聽政受馘而吾夫子肇明
六經之道如日麗天天下則而儀之為天下君者追而
顯之然至讀魯相晨廟碑則吾夫子之鄉其祀器典守
尚有所未備何況其他哉自是而後吾夫子之祀事日
益舉而古之所謂學者乃不盡麗於其宮是故天下多
有祀而無學至宋而稍稍合之休寧僻在萬山中其始

蓁蓁然安其為樸至宋而稍通于俎豆之事人材乘之以出霞蒸焱奮為世黼黻然而宋之所建與元及我明之所修其學宮俱隘陋弗稱又屬歲月久亡所不傾圮於是邑之賢士大夫侍御胡君輩居恒竊歎以休寧於東南最稱巖邑其戶口之繁庶居室之宏敞不在三吳下行賈偏於郡國而廩筴之藏悉以麾之梵苑叢林而亡所靳顧於吾夫子之宮與儒學乃若任其廢而弗為之所且吾儕幸而得與聞斯道以備世用乏而本之弗

思人其謂我何屬郡太守徐君司理舒君以行部至其
邦顧瞻之際慨然興愾時邑令陳侯仰承而身任之捐
月奉若干緡以倡諸吏民漸有應者於是謀之胡君總
其凡而博士弟子凡三金為世澤為有聲為人龍及汪
廷誥佐之胡君謂不穀之治蒲也有成模矣侍御何君
鄉進士程君輩聞而先之邑士民汪大光輩繼之其錫
自家帑以至於公相屬也其土石甃木自郊關以至丙
舍相屬也木取其偉長者石取其貞潤者甃取其堅緻

者於是有重建曰大成殿曰啟聖祠曰尊經閣曰敬一
箴碑亭曰二程祠曰三博士齋曰諸弟子讀書舍取更
新也有改建曰明倫堂曰儒學門曰文會堂曰朱子祠
曰名宦鄉賢祠取徙地也有創建曰成潔門曰省牲所
曰神廚曰報功祠曰遺教祠曰魯源亭曰壽雲門曰文
昌閣曰居業門故所無也其地闢五之一宮室拓三之
一創亦如之自是休寧之廟學蔚然稱鉅麗觀甲於郡
國而胡君乃與諸君具其事介幣於余友鄉進士詹君

而以記請余竊意之廟學成而邑大夫師弟子與其吏
民舍菜而登廟宮之陞有不儼然而若吾夫子臨之在
上者乎退而講於明倫之堂有不悚然而若君臣父子
長幼夫婦朋友之接於目而警於志者乎又退而登尊
經之閣集文會之堂肄乎讀書之舍有不油然而與詩
書易春秋禮樂之教相融浹而無間者乎及其出義路
辭禮門行稍遠則稍怠甚或錐刀之息屬乎手而求念
生睚眦之忿交於目而忮心作問其嚮之所謂儼然悚

然油然而忽然而失之矣其所以忽然而失者則其儼然悚然油然而暫然而得之非真際也且夫是廟宮與學之廢久矣其新之也木資之人也土石資之人也甃資之人也然一念之欲新而同志者來不浹月而材具不浹歲而廟宮與學成夫人心偶翳之耳非盡廢也五倫足之心六經足之心而吾夫子足之心苟欲新之不再念而來不浹時而具成矣而程子而邑之所稱以為其後者也朱子其所自稱以為而邑產者也今其學具

在即簡煩小異其大指有不本之心者哉廟宮與學之
新以跡教而德之新不以跡教余故稍次其語以紀成
事而示夫同志者徐君名成位楚竟陵人舒君名邦儒
芝城人陳侯名正謨閩南平人胡君名宥何君名其賢
程君名廷策詹君名景鳳皆邑人

太平府修城記

太平古金陵支邑也後稍進為郡與金陵俱倚天塹而
固自金陵之為帝者都而太平之人民田土兵衛不能

當其十之一然寔据其上遊為之儲胥禦圉而制其命如古所謂左馮翊者當天下之割而且合此不得太平不可以窺金陵南不得太平金陵不可以守夫以太平之重若此而自明興二百餘年以來守土者安於平治之形而不暇省其城低庳使弱者憑二尋之衿不必羽而登也所甃僅表而毋及裏陋不容軌土惡善潰不必淫霖而隳也萬厯辛壬間莆田林侯來為守恤民隱按吏弊興士風諸所以稱塞守狀良悉顧以時周行脾睨

間而憂之謂卒有不虞如桺欒何即不穀徂前人苟簡
及此以俟後之君子彼復徂我將縣官何所賴焉而會
治兵使者程公按部來與林侯筴合乃上侯議督撫中
丞孫公江防中丞呂公巡按侍御陳公得報可為具疏
聞之上下大司馬大司徒議報可下中丞侍御已復下
程公程公下侯所與倅陳某當塗令楊某規度所增築
為堞者三千七百六十而贏其崇二丈三赤而贏裏坦
之崇一丈六赤而贏厚一丈七赤而贏週遭為丈一千

六百六十而贏所改飾為麗譙者五為津關者三為戍廬者三百而贏計直為中金一萬七千七百九十而縮謀之帑不足則請諸郡減卒直八千四百四十餘金為之幹不足則陳公以千金益之程公再以千金益之孫公以五百金益之又不足林侯與楊令復率贖鍰千金益之又不足則為勇爵賜級以勸郡人某某凡三千餘金益之林侯乃率厲其屬與士卒分功於版築間蓋不閱歲而城成以書屬余俾紀其事余故嘗臆史所稱請

城洛陽與大梁者或以天子之守守在四夷諸侯之守
守在四鄰為說而譏其示人弱竊以為不然夫地利不
如人和雖賢者記之然至夫子之系易未嘗不曰王公
設險以守其國未已而又曰重門擊柝以待暴客蓋取
諸豫夫以大聖人而當取卦尚象時夫豈有暴客之足
虞而制為重門擊柝彼所以待衰預變之計周且遠也
故曰需有衣袽終日戒又曰其亡其亡繫于苞桑若世
宗朝寧不亦重熙累洽哉一旦島寇卒起而大江以南

佳麗之地其無城者城而庳且薄者悉其子女玉帛以
餒寇三里之垣苟不至隕老弱荷擔而立乘高下瞰賊
目飽氣盡而走耳城之不可以已也如是今幸臺察監
司諸大夫與林侯合筴而固太平不至大損縣官帑雖
曰齊民之力而善用之說以先民民忘其勞咸相率赴
事不歲而成百世之偉功且因以為金陵上游衛其事
豈淺小哉雖然所謂有形險也無形之險在黔首心林
侯固已饒得之矣請以是風倅令及後之君子毋忽諸

則永永有賴哉

蘭溪縣治廳壁記

吾里中張侯新之治蘭溪未改火而剪除其民之敗羣者乃均田賦清狴獄以與之更始而治事之舍日就圯上兩旁風靡所蓋護諸吏惴惴負廡壁而從事案牘拮据烏鼠共之何以譏訶闢入張侯嘆曰是猶可旦夕支及其拉然剗然而鼎創之費則巨量吾奈何避其名而貽巨量之費於後君子請諸郡得贖鍰之羨與口緡百

金而節縮其腹推贏祿佐之民獻其力工師毋敢匿寸
陰以戊寅之冬仲立趾明年之仲夏而告成事廳廣六
丈四赤深不及廣者二丈四赤高之為丈者三而加丈
之為赤者五左尉幕右緩庫總之若干楹吏廡以次益
宗易棟其規制大約不甚浮于昔而增完壯焉未幾張
侯以外艱歸而豫章喻侯均用故尚書郎出佐藩幕再
移而代為政居而甚安之乃捐書幣請于王子曰令今
苟免于僂人蓋有餘警云而敢即安於此雖然令驟居

馬而不虞夫拉然剗然也夫不虞夫拉然剗然者日而夕飯而興以顓精其思於吏治夫不虞夫拉然剗然者而不至勤用父老之力於土木則皆張侯賜也吾子其寵靈之一言以毋忘侯不佞曰善夫居者之安而追作者之勞甚厚道哉雖然喻侯今實居之夫蘭谿浙東最巖邑也其延袤四百里而奇其戶口十六萬七百而奇是居也四百里之所取風而十六萬人之所籍而孳育者也侯晨而坐堂皇少選而聽政夕而憇覩其巍乎崇

高者得無有遠於百里之歎乎夏共其稅賦於茲塵野
之橐得無憂於盡乎兩造實繁強者囂囂弱者得
無憂於不盡乎單亦得無尚失職乎學校之氣得無猶有
微阻乎一言善而應一言沃而違侯其慎之哉若夫洞
巖峙東蘭陰峙西南住為南白石為北爭出其朗爽秀
拔之資以助侯燕喜稍與邑之二三君子鼓琴歌薰修
宓氏之政而大之此則侯之終事也於是不佞之王父
司馬公去令垂一百年而吏民謳思之若新喻侯曰子

之一言寔徼王父大惠不佞亦曰二君子也繼王父而三夫誰曰不宜是為記

移建京圖營公署記

京圖總者故京口要害地也其先以一副帥臨之所部衛十五水陸師餘萬久之草而會島寇起議置將將秩自副帥殺而為把總置兵兵募士二千舟百七尋又裁為募士三百餘益以邑卒百五十餘其後稍益以募士三百六十餘通為兵八百最後始定京圖總以八百人

畫地上高資下安港所任汎警百五十里而遙而割鎮
江衛屬之京圖總始稍稍成軍矣顧其名駐圖山而署
實在京口故都指揮朱君以薦來治總事未幾嘆曰圖
山踞江汎以不時至而我高枕而安重城之內即緩急
何以達即達矣何渠能應之且將不控要害而士卒不
麗將其何以軍於是上書兵備使者王公請移京口署
於圖山兵麗之而他所上數事其要者在汰老弱革冒
食練行陣明賞罰兵備使者下郡守令議謂朱君所請

良是使者以聞督撫中丞宋公江防中丞王公諸臺御史
郭公陳公王公房公俱報可而獨王公慨然謂是總也其
移署筴甚長而訾短遂捐軍餉金五百以授丹徒尉楊泮
俾卜地於圖山之左大港不給而代王公者胡公及諸
臺御史郡守令復捐金二百以益之其又不給而朱君
倡其三哨之將吏士卒捐廩奉金若干以益之蓋不踰
季而將有署署有門有廡有堂有寢廂卒有營室而所
闢練地以辟民舍丘壟稍移之江口其費復朱君與吏

士任之既成朱君來謁余請紀其事于石余竊謂倭事
暴起人出其筴以為備列戍置壘相望於江海之涇而
大農少府之錢粟晝夜輦而委輸於軍一旦事定諸少
年握籌算而較之餉日以減卒日以耗戍壘日以頽廢
其將日漸省而其存者知有移於內地以自便而已上
下交相狎以幸而歲汎之不警幾得以遷或代去今朱
君獨能毋傳舍其官又不即安於內地而願以其身當
餘皇出沒衝王公又不忘危於安而寬其出納使朱君

獲信志焉其賢矣哉朱君雖所部八百人與一衛之畸
卒拊循而振之鉦鼓嘯呼江波立起勢若萬人斥邇相
應於百五十里間游徼之所旁及鹽鹽亡命椎埋之徒
鼠竄而不敢發則是署效也且為母負王公矣鵠巢之
詩戶牖綢繆六四之需衣袷終日古人之深慮遠顧若
此後而居是署者覽斯記者時時念之則又為母負朱
君哉王公名篆今為左副都御史楚之夷陵人朱君名
先今以游擊將軍行總事吳郡人

純節祠記

曇陽子之女於學士公也蓋嘗字徐生矣十七而邁上
真稍稍啟道要徐生之父叅議公且委禽焉而生驟病
物故曇陽子知之蓬跣三日哭出其橐則有成製縞服
草履御之以見學士曰兒托體大人不獲為徐生死當
為生稱未亡人學士亡以難而曇陽子故不食至是益
不食者六歲所曇陽子業為徐生守然當學道而上真
故試之以徐生之狀與辭加媼腆焉而曇陽子確不移

意者再而道遂成曇陽子之道成則請於學士曰願得一酌徐生墓既酌乃曰吾止此不歸矣家大小強之不可得則以一氈坐丙舍之中庭左暑雨不徙足毋論晝夜其又三月曇陽子乃辭衆立化化之前一夕復請於學士酌生墓既酌謂學士曰吾受上真命遺魄有所用之不獲已從徐生蓐螻蟻奈何蓋曇陽子猶兩髻云至是刃其髻之右授學士為我屬徐公衲生寔可也其明日為庚辰之秋九月九日其又四月而叅議公發徐生

之寔改葬於墓之震方去故地數十武而遙以曇陽子
之髻祔焉堂凡五楹中肖像為曇陽子示有尊也左室
之偏為徐生主而曇陽子配焉示有親也祠成而叅議
公署之曰純節而屬世貞記之夫曇陽子之為德備矣
於生死離矣顧斤斤焉取人道之一端而標之者何居
徐志也夫何以稱徐志也為徐氏始終故徐以家人禮
祠之也曰純節者何居節者竹之德也純者緣之德也
今夫竹自寸萌而縱之而尋丈以至於凌霄漢得節而

裁然後勁絲自寸縷而衡之以至邊幅色不雜而後得
稱為純其在於人亦然故節者所以禦滋也純者所以
澄節也甚矣節之不易言純也天下之成為婦而殉其
夫者二其恒以生殉而不恒以死殉此其志烈冰霜而
貫金石夫孰得而議其後然以百一較之恒者容或深
於情而不恒者容或激於變情故有所不能已而變故
有所不可已以是言純純得無間哉曇陽子未成婦者
也生不識徐生狀何所牽於情學士為之父何所虞於

變第謂人道當如是耳而矢不食之誓以附於祝宗之
祈死而竟不死當其道之成能使徐生出幽途受天趣
將何有於身之殉然其意若曰吾知所以為徐氏者而
已吾用是始必用是終而然後庶幾亡愧哉今夫上真
者得他心通者也夫豈待試而後知曇陽子欲以見曇
陽子純也生殉而不以情死殉而不以變至哉曇陽子
之純於節也始曇陽子嘗築室於郭之內以奉上真而
署曰恬澹學士公司之今祠郭之外叅議公司之君子

謂維世之教斯純節甚盛茂以加矣出世之旨則有恬澹在曇陽子他事詳大傳中徐生諱景韶有文行十八而天叅議公名廷祿以需調歸學士公王氏名錫爵佐大宗伯無幾以省覲歸夫二君子者景曇陽子之道而趣之將畢身者也

開太倉州朝陽關記

王公以燕見諸生而問所宜興者諸生劉大倫等對曰州故有婁江云自西而南而東達於海据三方而抱吾

州以為形勢海潮之至者日夜各得一焉其東入東關而西其西入西關而東以胥會於黉宮之左而後退諸芻粟貨幣之寓於舟者亦從而入以共吾州吏民其東關尤號稱利便而先年有警於海者謂其近之故累甃而塞之水折而南而西爭門以進其氣盛於金虎之方是以薦紳絀而介冑時勝其芻粟貨幣束於一竇而不得達是以物直踊而擔夫重其門於東者毋所受生氣是以其民蕭索而不舒所進不過樞負是以生理薄而

坐困竊以為復東水關便王公瞿然而聽曰固也吾且
行相地焉謂自故東關而稍南之踰一里許可穴也謂
其方曰巽方從生氣也關東西丈有二尺高加尋之三
以通舟而已其關之外則自濠而東蘆福涇以達半涇
而始得大河為丈者亦六百餘關之內則自濠而西轉
樊村合致河塘而始得故河為丈者殺其四十直因之
畝力因之直皆從民便也僅十五日而工畢王公營度
勢尤以為東少庠不能與西敵乃崇鐘樓以俯瞰之鐘

聲發則百雉而內外無不聞者於是東郊之氓轉輸無迂道左閭之氓化居無負戴而紆衿拖紳之士見若以為拾芥青紫已謹稱謳謠之不足則從諸博士某等介而請記於某以示永永某竊以春秋之義凡工役而義所不當舉者書重者書非時者書今王公所通一關耳乘民隙而用之力不能一旅時不過歲三十之一而何以書也為其從民願也百年之利在是矣蓋工甫畢而天子以公四履之地水當有所宣洩下璽書趣濬治之

夫公不難四郡一州十七邑而難此一衣帶水也雖然茲
非其小試也耶公諸興革功德於國家斯民甚大其為
鐘樓意甚遠皆不書書其所請者曰開朝陽關記公名
叔杲字陽德永嘉人以大叅行兵事

復周玉崖公賜墓田記

嘉靖辛卯南京刑部右侍郎玉崖周公卒於位時公秩
三品未及考而天子念其賢特賜祭有司為治墓葬公
之二十六年為隆慶丁卯而給事御史以故名臣當旌

者具公事狀上天子復為之超贈左都御史而其年巡撫林公潤下邑司禮公墓邑司言公墓田為畝者四十而贏秋賦為石者十六而贏官今不優蠲之而孳孳馬責半菽滯穗於松楸兩舍之地非所以安賢者魄而標士大夫觀也因具故少宰葉文莊公太常魏文簡公例以請林公是之許以他羨賦補著為令於是公之孫邦柱者感天子後先德意林公之能奉行於公之所遇愈遠而愈隆也謁不佞為文樹之石以垂永永不佞竊謂

古先聖王之政莫大於禮賢而厚終以故式閭表墓首
施之於勝國之臣而不為驟及德之衰於厚終且鮮矣
何乃能追遠也周公在正德中批鱗抗顏以與權幸搏
中縣官所甚諱遷謫萬里而不悔於時稱為直臣更化
之後雍容歷藩臬進臺省撫字與揚激相劑于時稱為
良臣公之所謂良臣者雖奪於年未盡究而計其為直
臣時緹帥尾之悍侯扼之其不委骨於瘴煙叢箐之間
者幾希即所望能過一首丘而竟自遷人起通顯其歿

也人主為治窳窳而不以煩其家其既葬而久也悉蠲其墓之賦而不以累其後人夫以一枯骨而榮施之若此其追遠當又何如也吾聞夫古之治冢塋者漢莫重於長平烈侯青冠軍景桓侯去病博陸宣成侯光唐莫重於英國忠武公勣陪位象武溫明之制幾與乘輿埒然未幾而失其族即不盡赭而鞠為茂草若教之餒因之周公非籍汙馬勞官猶在亞列而所賜墓地賴天子德意林公及諸有司之奉行易世而子孫能保之嗚呼

休哉君子謂邦柱可嘉也其能守也毋愧于周之冢孫
矣

陸氏放生湖悠然亭記

悠然亭者其址据湖之最勝處湖故陸大夫公有也當
陸大夫公日與其子司空與繩學憲與培輩舍而弗漁
而時時以所遇之鱗介毋論巨細即贖而放之故其湖
曰當湖一曰放生亭之北為沙盆渚其上有塔峙焉傍
為塔院翼之陸大夫公所營也渚東北為放魚磯夷於

水貴易也余嘗以通家子一再侍陸大夫公及公歿而
游於與繩最後登茲亭而寓目焉其隅湖莫南而全湖
枕於北粘天無岸日月得之澄鮮烜爛窳堵遏雲時吐
光恠萬堞止坤丹譙若霞園橋西南蜿蜒垂虹憑欄放
歌天籟和之意甚懌也既而叩與繩所以名亭之故則
取子產之校人語夫校人不能得魚事而能得魚理其
始舍之而圉圉焉縱之洋洋焉悠然而逝即古今善狀
魚者莫茲語若也然而魚之所謂悠然者與人異方其

失水而困於網罟也東縛之急鱗鬣盡挫第能覺其苦而不知有砧盎之虞及其獲水而圉圉而洋洋而悠然者形也非心也蓋至於悠然而俄頃之所謂苦者失之矣人之就網罟也庾絀攻其外而愁憂攻其內及其甫就解而前念後念交戰之賢者內追咎而思改不賢者追咎人而思報欲求所謂食息之悠然者竟不可得也故曰魚相忘於江湖易而人相忘於道術難也與繩曰不然吾之所以名在放生夫放生之名池久矣唐宋之

世州郡在在有之以祈人主福而責額數期日其十五
死餒而四飫於漁子之腹能生致者十之一耳環而隄
之一旦人主之法廢而耐水者徒手而取盈是以生理
發殺機也夫不取不放梁武之所以見屈於北使也今
吾則不然遇而贖贖而放唯不聽戕賊之耳而不為之
限量我悠然而忘魚放也魚之悠然而忘為我放也是
相忘也且我何知福余乃曰有是哉吾子之近道也雖
然吾子能為竺軋先生言獨不見夫婆竭之魚長四十

餘萬里兩目若日月游戲於無央之海天下之言快者
莫加焉而古先生曰此夙世業也欲脫解之其道無繇
耳然則為子之湖而魚者其業耶其非業耶業而生者
悠然耶將滅者悠然耶與繩听然而笑曰我非魚不知
魚之悠然子非我安知我之不知魚之悠然請志之楮
以俟河伯過而詰之

夢游記

五月九日夜四鼓夢有僧過訪語次曰去觀而西則華

嚴菴也能間一游乎問所以名菴曰普賢經行道場也
後有嶺石若青羊嶺故又曰青羊觀玉局老公像在焉
俄而御一小籃輿挾兩奚童西若沿長堤者其南皆麥
田黃雲被壠隱隱見城堞行可二里折而北得一橋其
高下瞰人屋而以磚砌之傍皆大榆柳橋下流水輶輶
余意已樂之又數十武則若街市頗坦陀而行人甚稀
山門翼然前所過僧出迓曰公來矣入門左方有若嚴
道場者梵唄磬鐸聲振耳拾級而上至前殿已又拾級

而上至後殿殿不甚高大亦稍敞而皆扃鐫不可開庭
際古槐壽藤虬龍屈蟠蒼翠映罨右廡得一竇而入僧
曰此禪房也室宇高下鱗接然不甚整次乃復循階偃
樓而上最後呀然門忽開目境若闢而新者蓋殿據山
而趾其後壁數丈外臨絕壑壁之後中一洞庭石二斧
劈二錦川翼之庠者亦可三丈許色皆甚紫文理密綴
皮骨皴瘃可恠壑之南為嶺中斷左右巖然青石望之
羊也逼而視之則不類以顧他石詭瑰千狀有若据獅

者若鬪虎者若牛下飲者若猿猱者其上皆髯松文栢
其高造天嶺之北則平湖萬頃一碧陰雲解馭日脚下
漏為金銀琉璃者不可勝計鳬鷗鸛鶴鴛鴦鸕鶿之類
散布砂磧爛若舒錦余顧僧曰此為何蘭若何墜耶吾
所知於里者海寧隆福淮雲三刹若衙院耳夫吾生五
十有七年矣而不知有此何也僧咲曰公自有之公自
不知耳雖然姑為我作一記送余至山門而別迺醒余
生平所游太和之南巖五龍諸宮洞庭之資慶包山長

圻錢塘之昭慶藕花洲諸寺其勝埒者當時歷歷真境
第不轉首而失之追數若一夢然則夜之所夢其果
真耶其非真耶今夢而真昔真而夢異耶不異耶既以
稱菴又稱觀老子之於普賢有諍耶無諍耶吾皆不能
為之辨而又何記為雖然吾既已許是僧矣姑以夢語
了夢事

弇州續稿卷五十六